

ساعت دوسینک

ای انوس نان سفرو تے ساغت دوسینکو بچین خلفو دوروتے بغائے۔ خلفو دور ہورو دورار ای بیچانہ اوشوئے۔ واو تان سوم چھوئے جوست ایوکون اوچے ای پیالا دوون گانیتائے۔ خلفو دورتو اوتیر کہ خلفو اڑ غال غیژی ڈانگو کھشون درے نشی اسور۔ ختانه کھشون پورغوروم بیٹی شیر۔ واو سلام کوری بی بتو سوم دوچھار ہوئے۔ ہسے نچیتو باڑا ایہہ روپھی دوچھار ہوئے۔ واو خلفو اڑ غالو گوچو نیشی بشاراحوال کوریتائے۔ خلفو اڑ غال نف چھومیکو ذکر شروع اریر۔ ریتائے کہ "ہائے ژور! ہاسی بیکنو نوم۔ کوئی ٹھور بوم رے پھوک پھوک کوری اف الومان"۔ بتوغو نسہ چمڈوریا قلائے بتو ٹیکہ برانو زینخ، پولیرو وا خور پوشورو نس اوشوئی۔ ہسے صحتو خرابیو لون دیاو ہتیتان لوسیکا پرائے۔ برانو ای کھماڑ شورو ٹحونو گونہ یو غیرے لاکھی اوشوئے۔ لوشیرو کھماڑو دون ٹینگ بیٹی تہ ژیبیکو گیروو غون ساریاوا اوشوئی۔ یو خلفو اڑ غالو موخ شائی چوکی پورو کاردوو غون بیٹی اوشوئے۔ عمر زیاد مگم خوراک جام بیکنن قالب قائی، مگم اپاکی دون بے وفا دوستو غون شاو ہو پیشھی اوشوئی۔ پروشہ ای دون بہچی ژینگاوا اینگار ناواہخ بیٹی بہچی اوشوئے۔ مگم بے سوم جستہ دی ہسے پوشوران چھوئے بیزبارو غون اف غیریاوا اوشوئے۔ لنگر آبادو نان بے دوايو موژی تیزیئے مڑاغان یئی نیزی ڈانگو ٹیکہ لاکھیتائی۔ خلفو اڑ غال غیچھان سورو گیرو تھوڑپاکو غون جلاوال پھوران ای ہوستین ایہہ کوری مڑاغان لوڑیتائے۔ مڑاغان پوشی بتوغو مینووتے ست کوریک دی یادی ہائے۔ چمڈوریو یئی زوقھئے ریتائے کہ "اے ژور پھوک اپاکی دوسا" لنگر آبادو نان پچو بیزار ہوئے "اے مہ شیرین نان، نو ژیبوم" رے اچی پھار زوق اریر۔ خلفو اڑ غال اچی تان چھومیکان ذکر شروع اریر "ہائے ژور! چھوچھی روپھی وے ہاسی سوم۔ خور رویان غون ای وختا جام غورزی ژیبیکو کہ بوم ہموش کو بوم"۔ لنگر آبادو نان، دیلا مہ شیرین نان رے بتوغو لوو محقول اریر۔ مڑاغان پھار گنی خلفو بوک ریتائے کہ "ہائے ژور کیہ جام ارو۔ سرد بیٹی بریومان۔ کندوری وخت ہوئے بیہ کفو (کپالو) خشوپاران نو بیٹی اوغ چٹیکو نو بیٹی اسیتام۔ اروابان متے رضا۔ چھوچھی روپھی پھان دروخاوا اوشوئے، تو گیاوا استاو۔ اوا ہمیتان لاکھوم۔ تہ دادا کہ پوشیتائے ہمیتان قڑاچ کوئے" لنگر آبادو نان ریتائے کہ "کیانی بوئے لہ مہ شیرین نان، وا کورا انگوم۔ ہنسیین مہ سوم کا گناک نو ہونی۔ شیق سو لوٹو سف لنگر آبادو سوم اویزان۔ اوا ساغتو بشار گیم رے بے درمان راہی اریتان۔ مہ دادا کوئے بی اسور" خلفو بوک ریتائے کہ "اے شور تہ دادا دورا کورا تھیوران۔ جوش بس لہاز والی کوری ویزین اچی گیتی اسیتائے۔ بنون بیئے نوغ انگیرو روژیو سوم ژاندار چوکی اسور رے بتو دیمیکو التی اسونی۔ بریکو غوش نیکی۔ شویا بی اسور لہ، شاو اچی گوئے۔ تہ سار پھوک پروشٹی اف نیساوا بیئے مہ ژاو تھورون گیتی تو رویا چوکیتائے۔ بتو ڈیکا نان کوچھائے نیسیرو بیرائے۔ دعا مشکیران۔ ای کھاکو سوم چھور کوروچی انگیرو بیرائے۔ خائے غریبوتے کا کیاغ دایان۔ تہ دادا قہری بیٹی نسین نیسائے۔ اسپہ بیچارہ مرید وا۔ مہ ژان پولیئر۔ کوس شکست کوریک مہ دیش۔ بتوغو ہالیئتام۔ بیئے شالتو پوشو کھیننیران۔ تہ دادا کہ ہائے اشقالی کوری کورا لیشٹاو کھوشیکو کوریئم"

بیہ مشقولگیو موژی شرانا کھوپیکو ہواز ہائے۔ دواہتا خلفہ ایئی اوتیتائے۔ درونگ قالب، شوقہ کھنی دیتی۔ میہی سمینو، کھپوڑا اچی کپ کوری، اڑوک بلاغونو نس کھپوڑو موڑو، نس بیری۔ خلفہ ژوغ، قالبیا پوشور کم پوئے زیاد۔ ہوستا مڑاغان نانیوتے پرائے۔ لنگر آبادو نان ایہہ روپھی سلام اریر۔ خلفہ ہوستو ایئی کوریکو ہتیرا وپچھیئتائے۔ واووتے ریتائے کہ "اے گور کیانی ہوو، تازہ گی تھے شیر" واو ریتائے کہ "جام لہ دادا۔۔۔" واو جوابو پورا کوریکار پروشٹی خلفو اڑ غال موژی غیری ریتائے کہ "لنگر آباد سودا بوغاک بیرائے۔ بیہ ساغت خبار گنیکو گیتی اسور" خلفا ریتائے کہ "اوه جام جام، ساغت لاڑیسی۔ مگم وا کتابان ایہہ دیہتو لکھی باتام۔ بتیئے نوغ روژیو سوم ژاندار چوکی اسور۔ وا دیمو بوغیلک۔ چھچھی کہ ہاوا نو اوا کتابان انگیتی ساغت لاڑیم" نانی ریتائے کہ "اے مہ ژوروتے ساغت لوڑے کی۔"

گنزول حسین البت دوری شیر۔ خور کتابان کیاغ کوسا۔ بیہ انوسی پون لیچھی کورا گوئے "خلفہ اچی
غیری اژ غالتے ریتائے له " اے کمیری تو براخچوسان کیا۔ گنزول حسینو دوری پیٹھی اوا کیاغ گنی
دیمو بی اسیتام۔ لنگر آباد مه خوش مرید۔ اوا بتوغوتے جام ارامہ ساغت لاڑیم۔ بیہ پنگاچھوئے گیار"
"جام له دادا کیانی بوئے" رے واو روپھی راہی اریر۔

اوبتی انوس چھوچھی ژوت لنگر آبادو نان پھوک خور مڑاغ کوری گنی راہی کوری خلفو دورا بغائے۔ جام
بیلوتے خلفہ دورا استائے۔ خلفو ویخیکان وارانگ انجی ویرومو ٹیکہ نشی اسائے۔ ہوستویئی درونگیئکو
واو ہتیرا ویچھیئتائے۔ بشار احوال کوریکو خلفہ ریتائے کہ "تہ پونگ جام بیرائے۔ چھویو جام اوریتتام
بہیل بوس، بہیل بوس" خلفو اژ غال دی ریتے کہ "ہائے ژور تہ پونگہ اورے ہوشا نو گیرو بیراتام۔ خور
کوس پونگہ پھتوکتو دار دیتی روشتی خوماو اوشوئے۔ بہیل بوس"

بے موژی خلفہ زوڑیئو یئی گنی کتابان بندان بیچھی ریتائے۔ ای کتابو بیلینجی چموٹا حساب اریر۔
"پھتوکی نو درست مس، جام مس، سفرو بچین جام۔ دی بہچیتائے ساغت" کتابو ورق دیتی ریتائے کہ
"جمعہ: جمعہ انوسان سردار۔ خطبو بچین جام۔ آدم اوچے بیبی حوا نانو بے انوس نکاح بیٹی شیر۔ مگم
موژو سفرو بچین جام نو۔

شنبه: مکرو چے فریبو انوس، جام نو۔

یکشنبه: کورمه ہوست دیکوتے جام مگم سفروتے نو۔

سہ شنبہ: خون دار انوس

چہار شنبہ: جام نو۔ بے انوس قوم ثمود و سورا عذاب خومیتائے۔

پنج شنبہ: وحی خومیکو انوس۔ اپراہیم پیعمبر بے انوس نمرود باچھو دربارا بغائے۔ مہم بے انوس جام۔
سفروتے دی جام"

ہموش رے خلفہ کتابان بڑاخیئتائے۔ اچی واووتے ریتائے کہ "پنشنہ انوس جام۔ بے انوس مس دی
جوست۔ لنگر آبادوتے راوے، بے انوس سفر نساں جاما"

لنگر آبادو نان دورا توری ساغتو لوو دیکار اچی سفرو باقاعدہ تیاری شروع ہوئے۔ لنگر آبادو شوقہ اوچے
شوالک نیگی تیار اوشونی۔ ای سن پھیروال اوچے گرابون پیرانو دی نیگیتانی۔ واو ای ژینجی خور باران
لوڑیتائے کہ کیاغ بہچانی مو۔ بیغار اچی پوندی پاچینک شروع ہوئے۔ جوش بسو سفرو بچین ٹیکہ
پاچیتانی، پوشور لچھیئتانی۔ پھکی اوچے شکر پھوستیک وا کیٹوری ژیرژوان سم کوری ہتے سوم کوری
شانگاشیو پرانی۔ بتوغو سوم بوغاک ملگیری صلاح کوری تیار ہونی۔